



Terenga 3: Hōtaka 32 – Te wā heke

He Mihi

E te uepū tōngakingaki, nau mai anō ki te ngaki i te māra o te reo Māori. Ko tātou ngā ringa tango parahia i te tinaku kūmara, e nui ai ngā hua ka puta i te whakahekenga o te werawera.

Hei Mahi Whakarongo

Anei tētehi o ngā pou o te Panekiretanga, he ahorangi hoki i te Pua Wānanga ki te Ao i Waikato, e whakamārama ana i ana whakaaro e pā ana ki te tapu o tēnei mea, o te whakataukī. Anei ngā pātai hei whakautu mā koutou:

- 1) E toru ngā tapu ka huaina e ia. He aha aua momo tapu?
- 2) He tapu ngā whakataukī ka titoa e tātou i ēnei rā nei, ki ōna whakaaro?
- 3) Hei ā whea rawa pea tapu ai ērā?

Tēnā whakarongo ake ki a Pou Temara nō Ngāi Tūhoe.

He Whakamārama

Ko ngā pū 'hei', 'ā' me 'ai' te tokotoru ka arohia e tātou i tēnei hōtaka. Ko te horopaki hei ārahi i ngā rerenga, ko te wā kei te heke mai. Ko ngā pū 'Hei' me 'Ā' ētehi o ngā pū hei whakataki i te rerenga e kōrero ana mō te wā kei te heke mai. Ka noho te pū 'ai' ki muri i te tūmahi hei tohu ake ehara te mahi i te aronga matua i roto i te rerenga. Tēnā tirohia ēnei tauria e rua:

1. Hei te wiki e tū mai nei tū ai te hui.
2. Ka tū te hui hei te wiki e tū mai nei.

Ko te aronga matua o te tauria tuatahi, ko te wā, nō reira ka whai te pū 'ai' i te tūmahi. Ko te aronga matua o te tauria tuarua, ko te mahi, nō reira kāore he 'ai' i muri i te tūmahi.

E rua ngā huarahi ka taea te whai mō te tauria tuatahi o runga ake nei:

Hei + wā + mahi + ai
Hei + wā + ka + mahi

1. Hei te tau 2014 māua haere ai ki tāwāhi.
2. Hei te tau 2014 māua ka haere ki tāwāhi.

I ētehi rerenga, ka noho te kupu 'reira' ki muri i te pū 'Hei', hei whakakapi i te wāhi ki te wā.

Hei + wā + mahi + ai
reira

1. Ka tū te hui ā tērā wiki. Hei reira tātou kite ai i a tātou.
2. Ka haere atu au ā te Rāmere. Hei reira tāua kōrero anō ai i te take nei.

Hei Mahi

Whakakāia ngā āputa:

1. Hei Te Wiki o Te Reo Māori _____ whakanuia ngā kaupapa whakatairanga i te reo.
2. Me tae-ā-tinana mai koutou ki te hui. Hei _____ tātou whakatau ai.
3. Ā te tau hou ahau uru atu _____ ki te whare wānanga ki te whai i taku tohu.

He Whakautu:

1. ka
2. reira
3. ai